

## SOSIALISME ISLAM MENURUT MUSTAFA AL-SIBA'I

Mohd Hatib Ismail

Pusat Penataran Ilmu dan Bahasa, Universiti Malaysia Sabah

Email: [mohdhatib@ums.edu.my](mailto:mohdhatib@ums.edu.my)

Ahmad Sunawari Long

Fakulti Pengajian Islam, Universiti Kebangsaan Malaysia

Email: [aslong@ums.edu.my](mailto:aslong@ums.edu.my)

Siti Rohani Jasni

Pusat Penataran Ilmu dan Bahasa, Universiti Malaysia Sabah

Email: [s\\_rohani@ums.edu.my](mailto:s_rohani@ums.edu.my)

### ABSTRAK

Ideologi sosialisme lahir dalam kalangan pemikir Barat bagi mewujudkan sebuah masyarakat yang berteraskan keadilan sosial. Mustafa al-Siba'i seorang pemikir muslim dari Syria juga berpandangan keadilan sosial yang ditekankan dalam konsep sosialisme sangat berkait rapat dengan ajaran Islam sehingga beliau menulis sebuah buku yang bertajuk 'Sosialisme Islam'. Namun, apakah idea Mustafa al-Siba'i boleh diterima dan selari teras ajaran Islam yang berpandukan al-Quran dan al-Sunnah. Kajian ini bertujuan untuk mengkaji latar belakang pemikiran Mustafa al-Siba'i yang membentuk idea sosialisme Islam. Kajian ini juga akan menganalisis perbandingan pemikiran sosialisme Islam dengan konsep kemasyarakatan Islam. Pengumpulan data dijalankan dengan mengumpul karya Mustafa al-Siba'i yang berkaitan system kemasyarakatan dan idea sosialisme beliau. Manakala, data akan dianalisis menggunakan kaedah analisis persejarahan dan analisis kandungan terhadap karya beliau. Hasil kajian mendapati Mustafa al-Siba'i sememangnya seorang akademia Islam yang komited dalam bidang akademik, politik dan sosial. Beliau memperkenalkan idea sosialisme Islam untuk mengimbangi keadilan sosial yang meliputi hak-hak individu dan masyarakat. Idea sosialime Islam beliau juga tidak bertentangan dengan dasar dan prinsip ajaran Islam.

Kata Kunci: Mustafa al-Siba'i, Pemikiran Islam dan Sosialisme Islam.

### 1. Pengenalan

Mustafa al-Siba'i telah menulis sebuah buku bertajuk *al-Ishtirakiyyah al-Islam* dalam membahaskan perkara tersebut yang dikenali sebagai sosialisme Islam. Beliau cuba memperkenalkan pembaharuan dalam sistem masyarakat Islam dengan memperkenalkan sosialisme Islam, namun beliau menegaskan bahawa sosialisme Islam bukanlah seperti sosialisme barat ataupun komunisme. Apa yang cuba diutarakan oleh tokoh ini ialah bagaimana sistem sosial Islam yang lebih baik daripada barat ataupun komunisme yang berpaksikan kepada al-Quran dan al-Sunnah. Mustafa al-Siba'i mendapat kritikan kerana dikatakan mengikut aliran pemikiran sosialis barat dan komunisme yang memperjuangkan idea sosialisme. Namun, penegasan dilakukan Mustafa al-Siba'i bahawa beliau tidak bersetuju sosialisme sebagai pemikiran aliran moden yang menjadi hak barat atau ideologi tertentu, bahkan sosialisme merupakan cita-cita kemanusiaan yang dianjurkan oleh para nabi dan pemimpin manusia sejak dari zaman purba. Cita-cita inilah yang menjadi impian bagi bangsa-bangsa dalam dunia hari ini, lebih-lebih lagi bangsa atau masyarakat yang kurang maju untuk membebaskan diri daripada kezaliman dan keburukan dalam sistem kelas dalam masyarakat yang menjatuhkan maruah manusia.

### 2. Biodata Mustafa al-Siba'i (1915-1964)

Tokoh ini lahir pada tahun 1915 di sebuah bandar yang bernama Homs, Syria dari keluarga yang mempunyai latar belakang agama yang kuat. Bapanya Husni al-Siba'i merupakan seorang tokoh berpengaruh di bandar kelahirannya (Zarzur 2003). Beliau pernah bertugas sebagai penyampai

khutbah di masjid besar Homs, di samping aktif berdakwah kepada masyarakat dengan membawa slogan amar makruf nahi mungkar (Thahhan 2002).

Kehidupan awal remaja Mustafa al-Sibai dihabiskan dengan menuntut ilmu dalam majlis-majlis ilmu (Zarzur 2003). Beliau sentiasa bersama bapanya menghadiri majlis diskusi ilmu berkaitan perbahasan fikah dengan ulama-ulama lain di sekitar bandar Homs. Pengajian ilmu al-Quran dan ilmu-ilmu asas syariah diperolehi daripada bapanya, manakala di peringkat pendidikan yang formal adalah sekolah rendah dan menengah (Thahhan 2002). Di samping itu, beliau pernah juga berguru dengan salah seorang Mufti Homs yang bernama sheikh Tahir al-Atasi (Abd Allah 1983). Beliau melanjutkan pelajaran di universiti al-Azhar, Mesir dan memperolehi sarjana muda Syariah dan Usuluddin pada tahun 1933 (Mohd Rumaizuddin 2009). Setelah itu, beliau menyambung pengajian di peringkat sarjana di universiti yang sama dan selesai peringkat tersebut dengan memperoleh sarjana dalam bidang Usuluddin. Kecintaan beliau terhadap dunia ilmiah diteruskan lagi dalam peringkat tertinggi sarjana kedoktoran falsafah sehingga dapat menyelesaikannya dan lulus cemerlang dengan sebuah tesis yang bertajuk *al-Sunnah wa Makanatuha fi al-Tasyri'* pada tahun 1949.

Mustafa al-Siba'i menghembuskan nafas terakhir pada hari Sabtu 3 Oktober 1964 bersamaan 20 Jamadil Awal 1384 selepas menghabiskan hampir keseluruhan hidupnya berbakti kepada agama, bangsa dan negara yang dicintainya. Kematian beliau merupakan satu kehilangan besar bagi penduduk Syria dan pergerakan Islam.

Antara karya-karya telah beliau hasilkan: *al-Sunnah wa Makanatuha fi al-Tasyri'*, *Al-Ishtirakiyyah al-Islam*, *al-Mar'ah Bayna al-Fiqh wa al-Qanun*, *al-Takaful al-Ijtima'*, *Akhlaquna fi al-Ijtima'*, *Min Rawa'ik Hadaratina*, *Sirah al-Nabawiyyah*, *Hadaratul Islamiyyah*, *Syarah Qanun Bayna al-Ahwal Al-Shaksiah*, *Haza huwa al-Islam*, *Ahkam al-Siam wa al-Falsafatuhu*, *Huquq al-haiwan fi al-Islam* dan *al-Istishraq wal-Mushtariqun*. Penulisan beliau menyentuh beberapa cabang bidang ilmu Islam seperti berikut:

#### **i) Bidang Hadis**

Pemikiran Mustafa al-Sibai melingkupi banyak ruang, pemikiran beliau mengenai kedudukan al-Sunnah dalam Syariat Islam memberi sumbangan besar kepada umat Islam. Beliau telah menjawab segala keraguan dan tuduhan yang dicanangkan oleh musuh-musuh Islam untuk melemahkan kedudukan al-Sunnah dalam tradisi sumber pegangan umat Islam. Keraguan dan persoalan yang ditimbulkan tentang al-Sunnah dijawab secara intelektual dan ilmiah oleh beliau. Dalam menentang arus dunia moden beliau membawa kepada umat Islam satu keyakinan bahawa al-Sunnah mempunyai kedudukan yang sangat penting sebagai garis panduan hidup beragama (Rumaizuddin 2009).

Mustafa al-Siba'i sememangnya tokoh yang mendahulukan al-Quran dan al-Sunnah dalam setiap pemikiran beliau, beliau juga seorang tokoh pemikiran Islam moden yang banyak membela al-Sunnah dari kecaman barat dan orientalis. Sumbangan beliau dalam bidang hadis antara yang besar ialah tesis yang dihasilkan bertajuk *al-Sunnah wa Makanatuha fi al-Tasyri'* yang berjaya membuktikan kerelevanan dan kredibiliti al-Sunnah dalam pelaksanaan hukum dan undang-undang Islam sepanjang zaman.

#### **ii) Tamadun dan Peradaban**

Menyentuh pemikiran tentang peradaban dan tamadun, Mustafa al-Siba'i (2005) mengarang sebuah buku bertajuk *Min Rawa'ik Hadaratina* yang menghuraikan tentang kemerosotan tamadun barat selepas mereka mendakwa mereka telah mencapai kemajuan dalam segenap bidang. Menurut beliau tamadun barat gagal membawa kebahagiaan dunia dan tidak dapat memainkan peranan sepenuhnya

untuk memimpin dunia. Justeru itu, beliau menyatakan umat Islam mampu membawa tamadun yang lebih sempurna, beliau meyakinkan masyarakat bahawa peradaban umat Islam memainkan peranan untuk mentadbir dunia, ini disebabkan:

1. Umat Islam berpengalaman memberi sumbangan terhadap pembangunan tamadun. Islam adalah kepercayaan ilmu yang menghormati akal dan mendorong akal menyingkap rahsia-rahsia. Islam mempunyai akidah akhlak yang lurus dan mulia, tidak mengamalkan sikap berlebihan melampau dan tidak adil..

2. Umat Islam mempunyai sifat rohani yang positif, rohani ketuhanan yang sehati dalam diri mereka. Ilmuwan Islam mempelopori bidang penelitian, falsafah, perundangan dan kemasyarakatan.

Bagi Mustafa al-Siba'i, maksud tamadun ialah satu sistem sosial yang membangunkan manusia bagi meningkatkan produktiviti kebudayaan. Tamadun ini terbentuk melalui empat bahagian utama iaitu sumber ekonomi, kuasa politik, tradisi moral dan khazanah ilmu dan seni. Menurutnya lagi, kejatuhan sesuatu tamadun kerana: Kerosotan akhlak dan pemikiran, sistem dan undang-undang rosak, kezaliman dan kemiskinan berleluasa, banyaknya sifat putus asa, tiada kepakaran dan kecekapan serta kemalapan pemimpin-pemimpin yang ikhlas.

### iii) Bidang Fiqh

Pemikiran Mustafa al-Siba'i (t.th) terhadap wanita pula berbentuk pembelaan terhadap hak kaum tersebut. Sebuah buku yang bertajuk *Wanita di Antara Hukum Islam dan Perundangan*. telah ditulis beliau untuk membicarakan hal tersebut. Karya ini bertujuan untuk menjawab dan menangkis serangan pemikiran barat tentang kedudukan wanita dalam Islam. Di samping itu membuang segala tanggapan buruk terhadap kaum wanita. Islam datang dengan unsur keadilan kepada hak setiap individu, tiada satu pihak pun yang dinafikan haknya dan mempunyai kedudukan dalam prinsip Islam. Sistem sosial masyarakat Islam membolehkan wanita bertindak mengikut beberapa kategori :

Pertama: Bidang kemanusiaan, Islam mengakui kemanusiaan wanita adalah sempurna. Martabatnya dengan lelaki adalah sama.

Kedua : Bidang kemasyarakatan, Islam mengalakkan wanita belajar dan menyertai pelbagai dimensi kemasyarakatan sejak awal kanak-kanak sehingga akhir hayat.

Ketiga: Bidang hukum, Islam memberi kemampuan bertindak kepada wanita apabila mereka dewasa. Hak ini tidak boleh dibatasi oleh orang lain.

### 3. Sosialisme Islam

Sosialisme menurut beliau mempunyai banyak fahaman, namun asas kepada fahaman tersebut ialah mengawal seseorang daripada menimbun harta di atas hasil titik peluh orang ramai dengan tidak adil. Maka pemerintah berhak mengawal pembangunan ekonomi dan melaksanakan keseimbangan ekonomi dalam masyarakat supaya golongan susah tidak ditindas. Pemerintah juga perlu mengimbangi antara golongan kaya-raya dan miskin (Mustafa al-Siba'i 1965). Ini antara aspek keadilan sosial yang terdapat dalam pemikiran sosialisme Mustafa al-Siba'i. Islam sebagai agama yang lengkap melihat persoalan kehidupan sosial mempunyai kaitan rapat dengan ruh sosialisme.

Kebanyakan negara yang dibelenggu masalah kezaliman ingin melaksanakan keadilan sosial melalui fahaman sosialisme kerana yakin aliran tersebut dapat menyelesaikan masalah sistem sosial. Oleh itu

Mustafa al-Siba'i umat Islam seharusnya untuk menunjukkan kepada mereka satu jalan yang lebih baik dan selamat bagi mencapai tujuan dan cita-cita yang baik dalam sosialisme. Jalan yang lebih terjamin daripada kerosakan dan sesetengah penyakit sosialisme itulah yang dinamakan sosialisme Islam. Kemunculan berbagai aliran dan ideologi atas nama keadilan sejagat dan keamanan sosial menyebabkan Mustafa al-Siba'i menimbulkan beberapa perseolan, antaranya: apakah sikap orang yang mempunyai kebenaran (yakni orang Islam yang mempunyai agama yang benar) ketika mana orang ramai sibuk untuk mencari pelbagai aliran dan ideologi untuk mencari kebenaran? Tidakkah mereka ingin membuat pembaharuan untuk menarik perhatian orang ramai kepada jalan yang lebih selamat? Kenapa kita kaum muslimin tidak tampil ke hadapan membuat pembaharuan dalam Islam dan menerangkan jalan agama dalam melaksanakan tujuan-tujuan yang baik dan menjadi impian manusia bagi segala abad? (Musatafa al-Siba'i 1965). Menjawab persoalan ini, Mustafa al-Siba'i berpandangan bahawa umat Islam perlu mengubah pandangan orang ramai terhadap aliran sosialisme tanpa panduan agama kepada Sosialisme Islam yang menekankan tatacara hidup sosial yang lebih baik.

Mustafa al-Siba'i lebih selesa menggunakan istilah sosialisme Islam kerana ia merupakan istilah yang lebih disukai oleh orang ramai pada ketika itu. Ini kerana keyakinan terhadap sosialisme sebagai jalan penyelesaian terhadap keburukan ekonomi dan sistem masyarakat yang tidak adil. Maka acuan yang terbaik untuk melaksanakannya sosialisme adalah dalam acuan Islam. Mustafa al-Siba'i menjawab persoalan yang ditimbulkan oleh pengkritik terhadap pemikirannya yang mengatakan bahawa sosialisme merupakan pemikiran dan aliran daripada Eropah dan merebak masuk ke dalam pemikiran orang Islam sehingga agama Islam bercampur sosialisme. Menjawab persoalan tersebut, beliau menyatakan setelah mengikuti kemajuan di eropah masyarakat Islam beralih pandangan ke sana bagi memperbaiki kedudukan, ekonomi, kemajuan dan keadilan. Mustafa al-Siba'i menegaskan bahawa tidak menjadi satu kepelikan dan kesalahan kalau kita mengambil dan meniru segala jalan dan pemikiran yang baik daripada barat dan eropah untuk memperbaiki keadaan kita. Apa yang benar daripada mereka perlu kita akui, namun yang menjadi kesalahan adalah kita menutup kebenaran dan jalan yang berkesan bagi menaikkan taraf kehidupan orang ramai (Musatafa al-Siba'i 1965).

#### **4. Sosialisme Islam dan Keadilan Sosial**

Perkaitan yang cuba dibawa pengkaji mengenai sosialisme Islam dengan keadilan sosial dalam pemikiran Mustafa al-Siba'i ialah bagaimana beliau merombak satu bentuk pemikiran baru dalam Islam yang menyentuh soal keadilan sosial dalam bentuk pemikiran moden yang boleh diterima pakai pada masa umat manusia berhadapan dengan berbagai aliran dan ideologi. Walaupun dilihat sesetengah falsafah keadilan sosial dan aliran sosialisme barat telah berjaya membela umat manusia di tempat mereka dengan keadilan dan mencapai kemajuan, namun masih banyak kelemahan dalam aliran pemikiran mereka. Melihat kepada keadaan itulah Musatafa al-Siba'i melihat apa yang benar dalam aliran dan falsafah mereka patut diterima, apa yang lemah ditolak. Barat mengeneppikan soal kebenaran agama, namun untuk mencapai kesempurnaan dalam membentuk keadilan dan keamanan hidup bermasyarakat, jalan yang terbaik adalah Islam yang lebih seimbang antara material dan rohani. Maka dengan itu lahir sosialisme Islam bagi mengembalikan keadilan sosial yang sebenar yang sepatutnya dijadikan landasan dalam kehidupan sosial untuk mencapai cita-cita keadilan sejagat dan keamanan sosial.

Dalam idea sosialisme Islam ini, beliau telah menggariskan beberapa dasar keadilan sosial utama iaitu;

##### **i) Hak hidup**

Allah s.w.t telah mengurniakan hak untuk hidup bagi setiap manusia, maka tidak boleh hak ini dicabar dan diganggu kecuali dengan kebenaran syarak. Oleh itu, haram melakukan pembunuhan terhadap

orang lain ataupun membunuh diri sendiri. Maka dengan itu setiap perkara yang perlu untuk kelangsungan hidup adalah wajib seperti memelihara kesihatan badan, mengawal penyakit merebak dan merawat pesakit. Begitu juga perkara yang merosakkan tubuh badan dan mengancam nyawa haram dilakukan seperti meminum arak, makan benda-benda yang berbahaya. Makan dan minum adalah wajib untuk terus hidup tetapi tidak melampaui batas.

ii) Hak kebebasan

Islam telah menetapkan kebebasan kepada setiap manusia semenjak dilahirkan. Insan yang merdeka itu ialah membuang segala bentuk penyembahan terhadap makhluk dan hanya menyembah Allah s.w.t. Setiap orang mestilah bebas dari segala bentuk kezaliman, sikap materialistik dan nafsu yang jahat.

iii) Hak Pengetahuan

Islam mewajibkan kepada umatnya untuk menuntut ilmu, Islam bukan agama yang memperakui bahawa boleh wujudnya orang yang jahil di samping orang yang pandai, kerana wajib orang yang jahil belajar daripada yang pandai dan wajib orang yang pandai mengajar orang yang jahil. Konsep yang disarankan Islam ialah belajar dan mengajar. Justeru itu, menjadi kewajipan pemerintah membasmi kejahilan dan buta huruf, menggesa orang berilmu menyampaikan ilmu kepada yang tidak berilmu.

iv) Hak kehormatan

Bagi setiap anak Adam dengan kemuliaan penciptaan Allah ke atas mereka mempunyai kehormatan tidak kira bangsa, agama, asal keturunan, bahasa dan keadaannya. Kehormatan bagi manusia untuk mendapat hak yang sama untuk mendapat kehormatan undang-undang, menerima bantuan, dan menjaga maruah.

v) Hak Memilik

Manusia diberi hak untuk mencari harta pencarian dan memiliki sesuatu yang diusahakan. Pintu rezeki dibuka untuk setiap orang. Kekayaan dunia tidak tertumpu untuk sesuatu golongan sahaja, bahkan setiap orang disaran untuk berusaha mengikut kemampuan dan tenaga masing-masing. Hartanya tidak boleh dilucutkan pemilikan dan dirampas sewenang-wenangnya.

## 5. Sosialisme Islam dan Kebajikan Sosial

Al-Siba'i (1998) menggunakan Istilah *al-Takaful al-Ijtima'i* yang merangkumi beberapa pengertian menurut beliau, antaranya adalah seperti berikut:

1. Jaminan dan tanggungjawab

Setiap individu menurut al-Siba'i (1998:180) dalam kalangan masyarakat berada dalam jaminan atau tanggungan masyarakat. Pengertian ini boleh difahami berdasarkan maksud hadis Rasulullah:

Demi diriku yang berada di dalam kekuasaan Allah bahawa sesiapa pun tidak akan masuk syurga jika tidak memberi perlindungan kepada jirannya yang terhimpit (Sahih al-Bukhari Juz 4 kitab al-adab bab ithm al-jar hadith 6016).

Tokoh lain juga ada menerangkan maksud yang sama dalam menekankan tanggungjawab pemerintah kepada rakyatnya seperti Muhammad Abu Zahrah (1987) menyatakan bahawa tanggungjawab setiap pemerintah adalah penjamin rakyatnya dan membantu mereka ke arah kebajikan. Masyarakat saling jamin-menjamin antara satu sama lain bagi meringankan beban seseorang serta menjauhi kerosakan yang yang menyusahkan.



2. Tolong menolong  
Al-Siba'i (1998:177) menghuraikan maksud tolong menolong berpandukan Firman Allah SWT yang bermaksud:

Hendaklah kamu bertolong-tolongan untuk membuat kebajikan dan bertaqwa, dan janganlah kamu bertolong-tolongan pada melakukan dosa (maksiat) dan pencerobohan. Dan bertaqwalah kepada Allah, kerana Sesungguhnya Allah Maha berat azab seksaNya (bagi sesiapa Yang melanggar perintahNya) (al-Quran, al-Maidah 5:2).

Hal ini juga disebut dalam sebuah hadis Rasulullah yang bermaksud: Tolonglah saudaramu, baik yang melakukan kezaliman atau yang dizalimi, kemudian nabi ditanya, "Bagi yang dizalimi kami wajib menolong, tetapi bagaimana pula untuk (menolong) orang yang melakukan kezaliman ya Rasulullah?" Nabi menjawab, "kamu pegang kedua tangannya atau kamu cegah dia daripada melakukan kezaliman, begitulah cara menolongnya (Sahih Muslim Juz 4, kitab al-Birr wa al-Silah, bab Nasr akh Zalim aw Mazlum, hadith 6747).

Allah SWT telah memerintahkan para hamba-Nya yang beriman untuk tolong-menolong dalam mengerjakan perkara kebaikan, iaitu *al-birr* dan meninggalkan kemungkaran dan kefasadan melalui ketakwaan *al-taqwa*. Allah s.w.t juga melarang mereka untuk tolong-menolong dalam perkara mungkar *al-batil*, dalam perkara dosa *al-ma'asim* dan dalam hal-hal keji serta diharamkan. Tolong-menolong adalah satu kewajipan bagi setiap individu manusia yang hidup bermasyarakat.

3. Memelihara kebajikan  
Al-Siba'i (1998:175) menjelaskan bahawa keadaan masyarakat dan negara yang terpelihara kebajikannya akan selamat daripada kerosakan dan kemusnahan. Semua individu terpelihara haknya. Setiap ahli keluarga terpelihara kebajikannya. Setiap lapisan masyarakat terpelihara keharmonian. Negara terpelihara dengan pemerintahannya yang adil. Setiap hasil bumi terpelihara dengan perkongsian dan pengagihan yang saksama.

Boleh disimpulkan melalui pengertian di atas bahawa *al-takaful al-ijtima'i* ialah pakatan antara individu, masyarakat dan pemerintah yang saling menjamin antara satu sama lain. Memupuk semangat tolong-menolong dari segi kebendaan dan kerohanian dan rasa bertanggungjawab atas setiap kesusahan yang berlaku dalam kalangan masyarakat. Memelihara sifat kasih sayang dan ukhwah antara umat serta melakukan perkongsian dan pengagihan sumber-sumber negara dengan seadilnya.

Konsep Jaminan Masyarakat (*takaful al-Ijtima'i*) menurut al-Siba'i terbahagi kepada dua bahagian iaitu:

- i) Golongan-golongan yang termasuk dalam jaminan masyarakat  
Mereka ini adalah golongan yang termasuk di bawah jagaan dan bantuan daripada masyarakat. Mereka terdiri daripada; orang-orang miskin, orang buta, orang-orang sakit, orang lumpuh, warga emas, orang terbiar, anak-anak terbuang, anak-anak yatim dan tawanan perang. Selain daripada itu, terdapat juga golongan yang patut dibantu ketika dalam kesusahan, mereka terdiri daripada; orang yang berhutang dengan secara yang halal, orang terputus perbelanjaan, tetamu yang datang ke rumah, orang yang ditimpa kemalangan, orang yang terlalu lapar dan dahaga, pemuda yang ingin berkahwin, membantu ketenteraan Islam untuk berperang dari segi kebendaan, bantuan kekeluargaan.

ii) Perbelanjaan dan Sumber Jaminan Masyarakat

Ini merupakan sumber yang boleh dijadikan sebagai jaminan masyarakat. Sumber boleh diperolehi daripada; Zakat, Nafkah kepada keluarga, Waqaf, Wasiat, Harta rampasan perang (Ghanimah), Harta galian (Rikaz), Orang yang bernazar untuk memberi sesuatu kepada orang lain, Bayaran kiffarat, Korban, Zakat fitrah dan Baitul mal. Semua yang disebut merupakan sumber yang boleh digunapakai bantuan kepada masyarakat yang layak menerimanya.

## 6. Penutup

Pengalaman hidup menjadikan Mustafa al-Siba'i seorang tokoh Islam yang prolific dalam hidupnya. Beliau merupakan seorang tokoh pejuang, pendakwah, pemimpin gerakan Islam, wakil rakyat dan juga seorang sarjana pemikir ulung dalam membangunkan umat Islam. Beliau merupakan seorang ahli akademik dan aktivis sosial yang banyak menyumbang terhadap pembaikan dan pembaharuan dalam dunia Islam amnya, dan khususnya di tanah kelahiran beliau Syria.

Pemikiran dan pembaharuan yang beliau lakukan melalui idea dan gerak kerja menunjukkan tokoh ini mempunyai daya intelektual tinggi dan kegigihan. Beliau semampu mungkin mengerah tenaga bagi memastikan umat Islam tidak dibelenggu oleh kejahilan, penindasan dan juga penganiayaan. Seharusnya golongan umat Islam yang terkemudian mencontohi sikap dan semangat yang ada pada diri tokoh ini.

## 7. Rujukan

- Abd Allah, Umar F. (1983). *The Islamic Struggle in Syria*. United States of Amerika: Mizan Press.
- Al-Siba'i, Mustafa. (1960). *Al-Ishtirakiyyah al-Islam*. Al-Qahirah: al-Dar al-Qawmiyah.
- Al-Siba'i, Mustafa. (1997). *Al-Takaful al-Ijtima'i fi al-Islam*. Riyadh: Dar al-Warraq.
- Al-Siba'i, Mustafa. (2005). *Min Rawa'ik Hadaratina*. al-Qahirah: Dar al-Salam.
- Al-Siba'i, Mustafa. (1965). *Sosialisme Islam*. terj. Hassan Saleh. Pulau Pinang: United Press.
- Al-Siba'i, Mustafa. (t.th). *Wanita di Antara Hukum Islam dan Perundangan*. Terj. Chadidjah Nasution. Jakarta: Bulan Bintang.
- Donohue, John. J & Esposito John. L (pnyt.). (1984). *Islam dan Pembaharuan*. terj. Machnun Husein. Jakarta: Penerbit CV Rajawali
- Mohd Rumaizuddin Ghazali. (2009). *10 Tokoh Sarjana Islam Paling Berpengaruh*. Selangor: PTS Islamika.
- Muhammad Thahhan, Musthafa. (2002). *Kepimpinan dalam Pergerakan Islam: Tokoh Pergerakan Islam Masa Kini Dr. Musthafa as-Siba'i*. terj. Muhammad Baihaqi. Kuala Lumpur: al-Hidayah Publishers.
- Muhammad Zarzur, Adnan. (2003). *Mustafa al-Siba'i al-Da'iyah, al-Mujahid, wa al-Faqih al-Mujaddid*. Damsyiq: Dar al-Qalam.
- Lawson, Fred H. (2004). *Muslim Brotherhood in Syria*. Dlm. Esposito, John L. et.al. *The Oxford Encyclopedia of Islamic World*. Vol 4. New York: University